

## ԳԼՈՒԽ ԺԲ.

### ԴԵՊՖԵՐԸ ԱՐԱՐԱՏԵԱՆ ԴԱՇՏՈՒՄ

Ալեքսանդրապոլի անկումից յետոյ, հայկական գորքերի մի մասը նահանջեց դէպի Սարգարապատ, Երևանի ուղղութեամբ: Այստեղ քիչ յետոյ տեղի էին ունենալու դէպքեր, որոնք բախտորոշ դեր էին կատարելու հայ ժողովրդի կեանքում: Նախ քան այդ դէպքերին անցնելը, սակայն, անհրաժեշտ է կանգ առնել ընդհանրապէս Արարատեան դաշտի անց ու դարձերի վրա — Արարատեան դաշտի, որը, շատ չանցած, կազմեց Հայաստանի Հանրապետութեան պատւանդանը:

Ռուսական յեղափոխութիւնը Երևանում էլ ընդունեց ցնծութեամբ: Հին իշխանութիւնը փոխարինեց նորով, և նահանգի կառավարութիւնը անցաւ Նահանգական Գործադիր Կոմիտէին՝ նախագահութեամբ առաջին շրջանում՝ Սմբ. Պաշտորեանի, ապա՝ Սահ. Թորոսեանի, և Զինւորական Պորհրդի Գործադիր Կոմիտէին — նախագահ Ստարցև: Առաջինը գերազանցապէս զբաղուած էր քաղաքացիական գործերով, երկրորդը՝ զինւորական: Քանի ճակատը կայուն էր, գերակշռող դերը պատկանում էր Զինւ. Պորհրդին: Այս երկու մարմինները գործում էին համերաշխ՝ աշխատելով ամուր պահել յեղափոխական կարգն ու ազգամիջեան խաղաղութիւնը և նպաստելով միաժամանակ ռազմաճակատի ուժեղացումին: Յունիս ամսին կազմեց և Հայ Զինւորական Միութիւնը, բժ. Յ. Մելիքեանի նախագահութեամբ, որ բաւական կարեւոր դեր կատարեց յետագային:

Յեղափոխութեան առաջին ամիսներին Երևան քաղաքի և նահանգի կեանքը ընթանում էր, համեմատաբար, խաղաղ\*): Տիրում էր համերաշխութիւն հայերի և թուրքերի միջև. երկու ազգերի մտաւորական ներկայացուցիչները գործում էին ձեռք-ձեռքի: Սակայն, հետզհետէ դրութիւնը սկսեց փոխւել. թիւրքերի և թուրք ազգայնականների զրգոտմով այստեղ ու այնտեղ սկսեցին գլուխ բարձրացնել քրդերը, յարձակւել ու թալանել երկաթուղին և խճուղիներով անցնող պարենակիր սայլերը, կողոպտել ու սպանել հայերին: Սկսեցին շարժւել և թուրք զիւղերը, մանաւանդ ռազմաճակատ տանող ճանապարհների և հանգուցային կէտերի վրա:

\*) Առ 1 յուն. 1916թ., պետական վիճակագրութեան համաձայն, Երևանի նահանգում ապրում էր 1,120,242 բնակիչ, որից հայեր՝ 669,871, թուրքեր՝ 373,582, քրդեր՝ 36,508, ռուսներ՝ 16,103, եզդիներ՝ 12,624 և այլն: Երևան քաղաքում հաշւում էր 51,286 բնակիչ, որից 37,204 հայ, 12,557 թուրք, մնացածը՝ ռուս, վրացի, հրէա և այլն («Кавк. Календарь», 1917г., стр. 214—221):